

Od straha do pouzdanja

Pronalaženje sigurnog utočišta u epidemiji

Živimo u danima tjeskobe i neizvjesnosti. Čitav svijet je u strahu. Iznenada smo postali svjesni krhkosti života. Šta će se dogoditi sutra? Snaga u kojoj se savremeni čovjek osjećao siguran pretvorila se u slabost, postoje pukotine na stubovima i osjećamo se ranjivo. Ljudi traže poruku mira i spokoja.

Krizna situacija, poput ove koju doživljavamo, potresa našu filozofiju života i slabi našu samodostatnost. To nas prisiljava da tražimo utočište u sigurnim vrijednosti. U finansijskim područjima, kada dođe do kraha berze, ljudi se oslanjaju na zlato. Šta je ekvivalent “zlatu” u našem životu? **U šta se možemo pouzdati?** Ovo je ključno pitanje.

Kršćani vjeruju da je sigurna par excellence vrijednost, “zlato” koje treba tražiti - vjera, vjera u Isusa. Apostol Petar je napisao «vaša vjera je dragocjenija od zlata» (1 Petrova 1:7). U to vjerujemo jer kršćanska vjera odgovara na najdublje potrebe ljudskog bića. Daje nam tri velika stuba koja nas drže:

- Potreba za **identitetom**: Ko sam ja? Odakle dolazim?
- Potreba za **svrhom**: Šta je život? Zbog čega sam ovdje?
- Potreba za **nadom**: Šta se događa nakon smrti?

Biblija, Božje “otvoreno pismo” čovječanstvu, uči nas putu koji vodi do pouzdanja u kriznim vremenima. Jedan od najhrabrujućih tekstova u tom pogledu je Psalm 91, također nazvan “**Trijumfalna himna pouzdanja**”. Udahnuo je ohrabrenje i mir milionima vjernika usred iskušenja.

Vjerojatno je **napisan usred epidemije kuge**. Okolnosti su bile slične onima koje danas doživljavamo. Stoga je njegova poruka vrlo relevantna za našu trenutnu epidemiološku situaciju.

Njegova poruka je sažeta u jednoj rečenici: **pouzdanje pobjeđuje strah**. Psalmist nam predstavlja "putovanje" od tjeskobe-straha do pouzdanja u tri koraka. To su zapravo isti koraci koje nalazimo u odnosu ljubavi:

- Poznavati Boga
- Voljeti Boga
- Pouzdati se u Boga

Upoznavanjem, želimo provoditi vrijeme zajedno, a provođenjem vremena zajedno više volimo. Tako je i sa vjerom. Kršćanska vjera je odnos ljubavi koji započinje ličnim susretom s Isusom, «slikom nevidljivog Boga» (Kološanima 1:15),

a održava se pouzdanjem. Pogledajmo ove korake:

1. Poznavati Boga

Bog je velika nepoznanica. Mnogi ljudi odbacuju Boga a da ni najmanje ne znaju o njemu; u stvarnosti, ono što oni odbacuju je njihova ideja o Bogu, Bog koji je plod njihove mašte. **Znati ko Bog zaista jeste je osnovni korak na putu ka pouzdanju.** Zbog toga psalam započinje sa sjajnim opisom Božje naravi:

*«Ti što prebivaš pod zaštitom Višnjega,
što počivaš u sjeni Svemogućega,
reci Jahvi: “Zaklone moj! Utvrdo moja!
Bože moj u koga se uzdam!» (Psalm 91:1-2)*

Četiri različita imena spominju se u uvodna dva stiha i objašnjavaju ko je i kakav je Bog. Kako moćna vrata pouzdanju! Prema psalmisti, Bog je Svevišnji, Svemogući, Zaklon i Utvrda.

Svjesnost o Božjoj veličini je temelj našeg pouzdanja. Mogli bismo parafrazirati popularnu izreku i reći “reci mi kakav je tvoj Bog i reći ću ti kakvo je tvoje pouzdanje”. Susrećući se s Bogom, psalmist u njemu otkriva *svoje sklonište, nadu, zaklon i utvrdu.*

2. Voljeti Boga

Drugo, poznavanjem, volimo i uspostavlja se lični odnos. Primjetite kako se psalmist odnosi prema Bogu, **MOJ** Bog, **moj** zaklon, **moja** utvrda. Zamjenica “moj” otvara jedinstvenu perspektivu i mijenja mnoge stvari: psalmistin Bog je **ličan, bliski Bog, koji interveniše u njegovom životu i brine** o njegovim strahovima i potrebama.

Tu imamo jedno od najistaknutijih obilježja kršćanske vjere: Bog nije samo Svemogući, tvorac Svemira, već i intimni Otac, Abba (“tata”) koji me voli i čuva. Ovo je naša velika privilegija: Bog se brine se za nas, kao što se otac brine za svog sina, jer u Isusu smo usvojena djeca Božja. **Za kršćanina Bog nije neki daleki “On”, već je blizu “nas”.** Zbog toga psalmist ovo iskustvo opisuje lijepom metaforom:

«Svojim će te krilima zaštititi, i pod njegova ćeš se krila skloniti: vjernost je njegova štit i obrana!» (Psalm 91:4)

3. Pouzdati se u Boga

Nakon što je otkrio ko je i kakav je Bog, i zavolio ga (Psalm 91:14), psalmist uzvikuje: «Bože moj, u koga se uzdam» (Psalm 91:2). Ljubav i pouzdanje hrane jedno drugo: pouzdanje je odgovor na ljubav, a ljubav je zauzvrat izražena kroz pouzdanje.

Kršćanin se uzda u Božju zaštitu izraženu na tri načina:

- **Bog zna**
- **Bog je u kontroli**
- **Bog se brine** (za mene)

U vjernikovom životu nema slučajnosti. **Naš život nije u nemilosti virusa, nego je u rukama Svemogućeg Boga.** Mi vjerujemo da se **ništa ne događa izvan Božje kontrole.** Stoga psalmist s pouzdanjem izjavljuje:

«Jer on će te osloboditi od zamke ptičarske, od kuge pogubne... Vjernost je njegova štit i odbrana... Nećeš se bojati...ni kuge što se šulja kroz tmine, ni pošasti što hara o podne... neće te snaći nesreća, nevolja se neće priključiti šatoru tvojemu.» (Psalm 91:3-6,10)

I sam Isus potvrđuje ovu stvarnost riječima suosjećanja:

«Zar se ne prodaju dva vrapca za jedan novčić? Pa ipak ni jedan od njih ne pada na zemlju bez dopuštenja Oca vašega. A vama su i vlasi na glavi izbrojene. Dakle: ne bojte se! Vi više vrijedite od mnoštva vrabaca.» (Mateju 10:29-31 vidi i Luki 12:6-7)

Kao veličanstven sažetak, sam Bog govori na kraju psalma i preuzima obavezu da ispuni svoja obećanja:

«Izbavit ću ga jer me ljubi, zakrilit ga jer poznaje moje ime. Zazvat će me a ja ću ga uslišiti, s njim ću biti u nevolji, spasit ću ga i proslaviti.» (Psalm 91:14-15)

U zaključku; **vjera u Isusa nije vakcina protiv svog zla, nego garant potpune sigurnosti**, sigurnosti da «ako je Bog za nas, tko će biti protiv nas?» (Rimljanima 8:31). Drugim riječima, vjera ne garantuje odsutnost kušnji, ali garantuje pobjedu nad kušnjama.

Nema mjesta trijumfalizmu, ali sigurno postoji trijumf. To je trijumf da nas Kristovo uskrsnuće uvjerava o njegovoj pobjedi nad zlom i smrti. To je isti Isus koji nam danas govori:

«Ja sam s vama u sve vrijeme do svršetka svijeta.» (Mateju 28:20)

U tome se nalazi sigurnost naše vjere i pouzdanje koje nadilazi svaki strah.

Dr. Pablo Martínez

Dr. Pablo Martínez je psihijatar, trenutno radi u Barceloni. Razvija cijenjenu službu kao predavač i učitelj u mnogim evropskim zemljama na teme poput "Svjest (um) i vjera", "Terapeutska vrijednost Evanđelja u emocionalnim problemima "ili" Briga o sebi ". Njegove knjige koje se bave navedenim temama su prevedene na 16 jezika. Predaje Pastoralnu teologiju i njegova uloga Biblijskog učitelja je također vrlo cijenjena. U Španiji je predsjednik Fondacije "Ravi Zacharias" i počasni je predsjednik "Grupos Bíblicos Universitarios" (GBU – IFES - EUS).

Web **Kršćanska Misao** daje informacije o književnom radu dr. Pablo Martínez i njegovog oca vlč. José M. Martínez. Kroz ovaj rad se pokriva širok raspon tema; teološka, psihološka i etička pitanja su posmatrana iz Biblijske perspektive s relevantnom i praktičnom primjenom u tekućim problemima.

*Copyright © 2020, Dr. Pablo Martínez
Dopuštena je integralna reprodukcija ovog članka bez izmjena
kad god se spominje ime autora i njegov izvor
(<http://christian-thought.org/bs/>)*